

# Presiden Halimah dilantik Canselor NUS



**CANSELOR NUS:** Presiden Halimah melancarkan bunga rasmi NUS, *Papilionanda*. Bersama beliau ialah (dari kiri) Presiden NUS, Profesor Tan Chorh Chuan; Pengerusi Lembaga Pengamanah NUS, Encik Hsieh Fu Hua; dan Timbalan Presiden NUS (Hal Akademik) dan Provost, Profesor Tan Eng Chye. – Foto NUS

PRESIDEN Halimah Yacob telah dilantik selaku Canselor ke-10 Universiti Nasional Singapura (NUS).

Beliau, yang sebelum ini alumni NUS dan mantan anggota Lembaga Pengamanah dan Siswazah Kehormat NUS, telah menyampaikan ucapan sulungnya selaku canselor semasa satu acara makan tengah hari di Dewan Universiti NUS, semalam.

Semasa berucap, Presiden Halimah berkata berkhidmat sebagai Canselor merupakan satu penghargaan buat dirinya, mentelah lagi universiti tersebut mengamalkan budaya berkhidmat yang kukuh.

“Ia amat serasi dengan saya. Saya percaya bahawa menjalani kehidupan yang bermakna adalah yang paling memuaskan,” kata beliau.

Puan Halimah turut memuji transformasi institusi bertaraf tinggi itu, yang kini bukan sahaja dihormati di Singapura, malah di seluruh dunia.

Namun dalam kemajuan pesat universiti tersebut, beliau terharu etosnya kekal sama iaitu berkhidmat dan menyumbang kembali kepada masyarakat.

“Selain menawarkan pendidikan berkualiti, NUS telah memberi tumpuan utama dalam membangunkan pelajarnya menjadi penyumbang aktif kepada masyarakat.

“Saya gembira ramai pelajar serta fakulti telah memperkenal dan mengekalkan pelbagai

program dan kegiatan untuk berkhidmat kepada masyarakat,” ujar beliau.

Ini menurut Puan Halimah, termasuk usaha pelajar daripada pelbagai fakulti berkaitan kesihatan memanfaatkan kemahiran yang dipelajari dengan membantu warga tua atau pelajar undang-undang melakukan kerja-kerja pro-bono atau menolong secara sukarela bagi membantu mereka yang kurang bernasib baik dalam masyarakat.

Dalam pada itu, Puan Halimah turut menyambut baik budaya *start-up* atau perniagaan baru serta keusahawanan dalam kalangan pelajar dan anggota fakultinya.

“Apa yang lebih menggalakkan ialah kebanyakan syarikat *start-ups* ini merupakan mereka yang berada dalam ruang keusahawanan sosial, memanfaatkan inovasi agar dapat membawa perubahan positif dalam masyarakat,” katanya lagi.

Puan Halimah turut melancarkan bunga rasmi NUS dalam acara tersebut.

Bunga *Papilionanda* mengongsikan keturunan yang sama dengan bunga *Papilionanthe* Miss Joaquim, bunga negara ini.

Bunga *Papilionanda* NUS memaparkan kekuatan dan semangat tahan lama universiti yang ditubuhkan pada 1905 itu.

Warna aprikot terang pada kelopak bunga itu juga mencerminkan warna universiti tersebut iaitu oren yang melambangkan tenaga, semangat muda, minat dan imaginasi.